


特別
18
3414
4





特

門 八 18
號 3414
卷 4

御訂全金詩增補中州集卷九

金元好問原本

禮部閒閒趙秉文一 原六十三首

秉文字周臣滏陽人閒閒其自號也幼穎
悟讀書若夙習大定二十五年進士應奉
翰林文字上書論宰相胥持國當罷宗室



守貞可大用又言獄訟征伐國之大政自古未有君以爲可大臣以爲不可而可行者坐譏訕免官未幾起爲同知岢嵐軍州事轉北京路轉運司度支判官承安五年冬十月陰晦連日宰相萬公入對上顧謂萬公曰卿昨言天日晦冥亦猶人君用人邪正不分者極有理趙秉文曩以言事降授聞其人有才藻工書翰又且敢言朕非

棄不用以北邊軍興姑試之耳泰和二年改戶部主事翰林修撰出爲寧邊州刺史二年改平定州治化清淨所去人思之貞祐初中國仍歲被兵公建言時事可行者三一遷都二導河三封建朝廷畧施行之四年除翰林侍講學士明年轉侍讀興定中拜禮部尙書兼侍讀同修國史知集賢院開興正月京師戒嚴時公已老日以時

事爲憂雖食息頃不能忘每聞一事可便
民一士可擢用大則拜章小則爲當路者
言殷勤鄭重不能自己竟用是得疾薨年
七十四自幼至老未嘗一日廢書不觀著
易叢說十卷中庸說一卷揚子發微一卷
太玄箋贊六卷文中子類說一卷南華略
釋一卷列子補注一卷刪集論語孟子解
各一十卷資暇錄一十五卷所著文章號

滄水集者前後三十卷大槩公之文出於
義理之學故長於辨折極所欲言而止不
以繩墨自拘七言長詩筆勢縱放不拘一
律律詩壯麗小詩精絕多以近體爲之至
五言大詩則沈鬱頓挫學阮嗣宗真淳簡
澹學陶淵明以他文較之或不近也字畫
則有魏晉以來風調而草書尤警絕殆天
機所到非學能至宣徽舜卿使河湟夏人

多問公及王子端內翰起居狀朝廷因以
公報聘其爲四方所重如此論者謂公至
誠樂易與人交不立崖岸主盟吾道將三
十年未嘗以大名自居仕五朝官六卿自
奉養如寒士不知富貴爲何物蓋學道所
得云

補歸潛志趙秉文字周臣磁州滏陽人少
擢第作詩及字畫有名王庭筠子端薦入

翰林因言事忤旨外補後再入館爲修撰
待制轉禮部郎中出典岢嵐平定寧邊三
郡南渡爲直學士遷侍讀拜禮部尙書致
仕再召爲禮部改翰林學士天興改元夏
四月卒年七十三公幼年詩與書皆法子
端後更學太白東坡字兼古今諸家學及
晚年書大進詩專法唐人魁然一時文士
領袖壽考康寧爵位士大夫罕及焉性踈

曠無機鑿治民鎮靜不生事在朝循循無
異言家居未嘗有聲色之娛夫人卒不再
娶斷暈肉麤衣糲食不恤也酷好學至老
不衰後兩目頗昏猶孜孜執卷抄錄上至
六經解外及浮屠莊老醫藥丹訣無不究
心其所著有太玄解老子解南華指要滄
水集

補歸潛志金取士以詞賦爲重故士人往

往不暇習爲他文嘗聞先進故老見子弟
輩讀蘇黃詩輒怒斥故學者止工於律賦
問之他文則懵然不知聞有登第後始讀
書爲文者諸名士是也南渡以來士人多
爲古學以著文作詩相高然舊日專爲科
舉之學者疾之爲仇讐若分爲兩途互相
詆譏其作詩文者目舉子爲科舉之學爲
科舉之學者指文士爲任子弟笑其不工

科舉殊不知國家勅設科舉用四篇文字
本取全才蓋賦以擇制誥之才詩以取風
騷之旨策以究經濟之業論以考識鑒之
方四者俱工其人才爲何如也而學者不
知徂於習俗止力爲律賦至於詩策論俱
不留心其弊基於爲有司者止考賦而不
究詩策論也我嘗記故老云泰和間有司
考詩賦已定去取及讀策論則止用筆點

廟諱御名但數字數與塗注之寡多有司
如此欲舉子輩專精難矣南渡後趙楊諸
公爲有司文風始振然而謗議紛起矣

補歸潛志趙閒閒嘗言律詩最難工須要
工巧周圍吾聞竹溪党公論以爲五十六
字皆如聖賢中有一字不經爐錘便若一
屠沽子廁其間也又云八句皆要警拔極
難一篇中須要一聯四句爲主後但以意

收拾之足爲好詩矣又嘗與余書曰選詩
曰南登灞陵岸回首望長安朔風動秋草
邊馬有歸心明月照高樓流光正徘徊此
其含蓄意幾何又曰小詩貴風騷今人止
作硬語非也

補歸潛志閒閒平日字畫工夫最深詩其
次又其次散文也嘗語余曰今日後進中
作文者頗有三二人至今作詩者絕少字

畫亦無也以是知公所長然議論經學許
王從之散文許李之純雷希顏詩頗許麻
知幾元裕之字畫頗許麻知幾馮叔獻也
又嘗教余學書先法張旭石柱記每日汝
輩幸有天資正不許學古人一點一畫寫
也

補歸潛志閒閒論文曰文字無太硬之純
文字最硬何傷王翰林從之則曰文字無

全金言卷九
七
軟硬惟其是耳余嘗以質諸先人以趙論
爲是

補歸潛志閒閒以文字名一世於吏事非
所長興定初木虎高琪爲相惡士大夫有
罪輒以軍儲論加箠杖在位者徃徃被其
苦俄命趙公攝南京轉運司未幾果坐誤
糧草事當杖旣奏宣宗曰學士豈當箠耶
高琪曰不然無以戒後遂杖四十公大憤

焉其後高琪誅詔適當公筆首日君臣分
嚴無將之罪莫大夫婦義重不睦之刑何
逃曾是一身兼此二惡人謂趙公之仇雪
矣

補歸潛志正大初閒閒長翰苑同陳正叔
潘仲明雷希顏元裕之諸人作詩會嘗賦
野菊趙有云崗斷秋光隔河明月影交荒
叢號蟋蟀病葉掛蠨蛸欲訪陶彭澤柴門

何處敲諸公稱其破的也又分韻古瓶臘
梅趙云茗華吐碧龍紋澁燭淚痕踈鴈字
橫後云嬌黃喚起昭陽夢漢苑淒涼艸棘
生句甚工潘有云命薄從教官獨冷眼明
猶喜跡雙清語亦老也後分憶橙射虎題
甚多最後詠道學雷云青天白日理分明
亦爲題所窘也閒閒同館閣諸公九日登
極目亭俱有詩題云魏國河山殘照在梁

王樓殿野花開鷗從白水明邊沒鴈向青
天盡處迴未必龍山如此會座中三館盡
英才雷希顏云千古雄豪幾人在百年懷
抱此時開李欽止云連朝倥傯簿書堆辜
負黃花酒一杯

補金史秉文上言宰相胥持國當罷宗室
守貞可用章宗召問言頗差異於是命知
大興府事內族膏等鞠之秉文初不肯言

金言卷九
九
詰其僕歷數交游者秉文乃曰初欲上言
嘗與修撰王庭筠御史周昂省令史潘豹
鄭贊道高坦等私議庭筠等皆下獄決罰
有差有司論秉文上書狂妄法當追解上
不欲以言罪人遂特免焉當時爲之語曰
古有朱雲今有秉文朱雲攀檻秉文攀人
士大夫莫不耻之

附元好問閒閒公墓銘唐文三變至五季

衰陋極矣由五季而爲遼宋由遼宋而爲
國朝文之廢興可考也宋有古文有詞賦
有明經柳穆歐蘇諸人斬伐俗學力百而
攻倍起天聖迄元祐而後唐文振然似是
而非空虛而無用者又見於宣政之季矣
遼則以科舉爲儒學之極致假貸剽竊牽
合補綴視五季又下衰唐文奄奄如敗北
之氣沒世不復亦無以議爲也國初因遼

宋之舊以詞賦經義取士預此選者選曹以爲貴科榮路所在人爭走之傳注則金陵之餘波聲律則劉鄭之末光固已占高爵而釣厚祿至於經爲通儒文爲名家良未暇也及翰林蔡公正甫出於大學大丞相之世業接見宇文濟陽吳深州之風流唐宋文派乃得正傳然後諸儒得而和之蓋自宋以後百年遼以來三百年若党承

旨世傑王內翰子端周三司德卿楊禮部之美王延州從之李右司之純雷御史希顏不可不謂之豪傑之士若夫不溺於時俗不汨於利祿慨然以道德仁義性命禍福之學自任沉潛乎六經從容乎百家幼而壯壯而老怡然渙然之死而後已者惟我閒閒公一人公諱秉文字周臣姓趙氏閒閒其自號也世爲磁州滏陽人祖諱某

用公貴贈正議大夫上輕車都尉天水郡伯考諱某贈中奉大夫上護軍天水郡侯李右司誌其墓述先世以來詳矣公幼穎悟讀書若夙習弱冠登大定二十五年進士第調安塞簿以課最遷邯鄲令再遷唐山丁郡侯憂用薦者及提刑廉舉起復充南京路轉運司都勾判官丁太夫人某氏憂又用薦者起復應奉翰林文字同知制

誥上書論事坐譏訕免官未幾起爲同知岢嵐軍州事轉北京轉運司度支判官泰和二年改戶部主事遷翰林修撰考滿留再任衛紹王大安初北兵入邊召公與待制趙資道論邊備公言今大軍聚宣德宣德城小列營其外夏暑雨器械弛敗人且病迨秋敵至我不利矣可遣臨潢一軍擣其虛則山西之圍可解兵法所謂出其不

意攻其所必救者也王不能用其秋宣德
以敗聞十月出爲寧邊州刺史二年改平
定州前政苛於用刑盜賊無大小皆梟殺
之間赦將至先梟賊死乃拜赦而盜愈繁
公爲政每從寬厚不旬月盜賊屏跡終任
無犯者歲饑出俸粟爲豪民倡以賑貧乏
賴以全活者甚多及受代老幼攀挽戀戀
不忍訣已出郭復遮留之再三乃得去入

爲兵部郎中兼翰林修撰俄提點司天臺
崇慶二年春太白經天公上奏歲八月當
有人更王之變當國者以爲妖言置章不
通及期王出居衛邸如公言俄轉翰林直
學士貞祐初公言時事三一遷都二導河
三封建大略謂中國無古北之險則燕爲
近邊車駕幸山東爲便山東天下富強處
也且有海道可通遼東接上京宋有國時

河水常由曹濮開滑大名東平滄景會獨
流入於海今改而南由徐邳水行處下視
堤北二三丈有建瓴之便可使行視故堤
稍修築之河復故道則山東河南合敵兵
雖入可阻以爲固矣三代封建外裔不能
得中國之利秦罷諸侯而郡縣之無敵禍
而有不及相救之禍喻如秦銷鋒鏑令民
間不得藏弓矢是也墮名城令腹內州軍

不置樓櫓是也在承平日若無患及其弊
則天下有土崩之勢秦之勝廣漢之張魯
唐之安史皆是也房琯因祿山之亂請出
諸王分置諸道祿山聞之曰天下不可得
矣今就不能復三代之故亦宜分王子弟
置諸道節度則是山東有大河之險有維
城之固而無燕近塞之憂一舉而三者得
矣明年上書請爲朝廷守殘破一州上以

公宿儒當在左右不宜補外不許四年除翰林侍講學士明年轉侍讀學士興定中拜禮部尙書兼前職同修國史知集賢院事又明年知貢舉坐爲所累奪一官致仕有旨以卿常告老今遂之也公家居上所以禮遇公者不少衰時遣中使問卿精神何如往年不數日復起爲禮部尙書兼官如故入謝上曰卿春秋雖高以文章故須

復用卿公亦以身受厚恩無以自効願爲天子開忠言廣聖慮每進見從容爲上言人主當儉勤慎兵刑所以祈天永命者上嘉納焉今天子卽位公再以年乞身改翰林學士修國史公以上嗣德在初當日親經史以自裨益進無逸直解貞觀政要申鑒各一通開興改元北兵由漢中道襲荆襄京師戒嚴上命公爲赦文以布宣悔悟

哀痛之意公指事陳義辭情俱盡城下之
役國家所以感人心作士氣者公有力焉
時公已老日以時事爲憂雖食息頃不能
忘每聞一事可便民一士可擢用大則奏
章小則爲當路者言殷勤鄭重不能自己
竟用是得疾以夏五月十有二日春秋七
十有四終於私第之正寢時軍國多故賻
祭不及大夫士相弔閭閻細民亦知有邦

國殄瘁之歎越二日權殯開陽門外二百
步有待也積官至資善大夫勳上護軍爵
天水郡侯食邑一千戶實封一百戶先娶
劉氏再娶郭氏並封天水郡侯夫人前公
卒子男一人名似待闕御史臺椽女三人
長劉出也嫁汝州推官高可約次嫁衛州
行部郎中石玠季嫁省知管差除令史張
履三婿皆名進士也所著書傳於世

已詳

中州集原傳

公之塋也孤子似以好問公

門下士來速銘因考公平生而竊有所嘆
焉道之傳可一人而足所以弘之則非一
人之功也唐昌黎公宋歐陽公身爲大儒
繫道之廢興亦有皇甫張曾蘓諸人輔翼
之而後挾小辨者無異談公至誠樂易與
人交不立崖岸主盟吾道將四十年未嘗
以大名自居仕五朝官六卿自奉如寒士

而不知富貴爲何物生河朔鞍馬間不本
於教育不階於講習紹聖學之絕業行世
俗所背馳之域乃無一人推尊之此文章
字畫在公爲餘事自以徒費日力者人知
貴之而不知貴其道歟桓譚有言凡人賤
近貴遠親見揚子雲故輕其書若使更閱
賢善爲所稱道其傳世無疑譚之言今信
矣然則若公者其亦有所待乎銘曰道統

中絕力任權御一判藩籬倒置冠屨公起
河朔天以經副挺身頽波爲世砥柱優柔
而求饜飫而趨春風舞雩如望趨步心與
理叶默以言寓發道大全初莫我助大夜
而旦大夢而寤乾端坤倪軒豁呈露致知
力行開物成務在德爲柄在治爲具吾道
非耶而以文遇足已無待恃義不懼憂國
愛君華首彌固藏書名山京師其副後禮

樂興當表公墓

雜擬三首

朱明變氣候大火向西流六龍整征轡倏忽夏已
秋閭闔來悲風霜稜被九州豈不念時節歲律聿
其周精衛填溟海木石安所投獨攜羨門子高步
登崑丘千秋長不老永謝區中囚

猗猗南山竹並生凡卉叢歲晏多霜雪見別蕭艾
中我欲食鷓雛千歲不一逢留之和律呂截作嘯

金鑑詩卷九
谷筒一變爲清商日莫來悲風清泉漑石根上有
白雲封虛心抱靜節知音爲誰容不如歸去來一
竿釣清澧

白日淪西汜滄海無回波四時更代謝奈此遲莫
何我欲制頽光惜無魯陽戈憑高望八荒踟眺迷
山河驚風振江海山林無靜柯獸狂走四顧曠野
迷絳羅西登廣武山北顧望三河蓬蒿蔽極目人
少虎狼多喟然發長歎撫劍徒悲歌

花下墓

山前樹今人看花昔人墓昔人栽花待邀賓花開
墓上人何處今年花盡復明年今人復爲後人憐
酒澆墓上喫不得留與飢鷗作寒食

勸王右丞獨坐幽篁裏

獨坐幽林下談玄復觀易西日隱半峰返照林間
石石上多古苔山花間紅碧花落人不知山空水
流出

和陶淵明擬古五首

小智多自私大方乃無隅一毫納萬象萬象非卷
舒日月爲我牖天地爲我廬曲士窘拘囚一身無
容居我夢登日觀青天入平蕪俯視但一氣二豪
彼何如

昔日穆天子侈心窮八荒崑崙入馬蹄遽廬視明
堂王母爲之謠白雲何茫茫憑高俯九州塊如螻
蟻場歸來越河關萬象壓崧邛遂令學仙者聞風

爲激昂漢武千秋露淮南八公方至今瑤池宴空
爲後代傷

吾道無緇磷萬古常如茲奈何中智下謂彼不知
時與世頗殊好譬彼澠與淄我欲質所從登高望
九疑路逢古漁父長歌滄海辭出門異所見退坐
還自思當世固殊古古人不我欺翩翩出林鳥日
莫將何之倚簷送歸盡聊欲弦吾詩

西北有佳人樓上撫雲和一鼓別鶴操再弄求凰

全金言卷九
三
歌絃聲幾欲絕哀響何其多昔爲掌中珍今爲路
傍花壯年不再得華落將如何

張衡詠思立屈平賦遠遊高情薄雲天意氣隘九
州朝攀扶桑枝夕飲弱水流翻然不忍去無女哀
高丘嚴霜下百草歲律聿其周蕭蘭共憔悴已矣
吾何求

中秋

天風吹河漢明月懸清光清光不可掇流影入杯

觴吸此風露魄洗我冰炭腸向來功名心一笑雪
沃湯人生幾中秋彈指三萬場胡爲置熱惱不使
心清涼此心如秋月虛明洞八方此身萬化中太
山一毫芒尙無物與我何者爲彭殤推琴黃葉落
矯首白雲翔解衣一盤礴清境墮渺茫

送雷希顏赴涇州錄事李君美治中公廨南
樓坐中作

嚴霜枯百草搖蕩鴻鵠心翩翩萬里翼隨雲落西

南涇州東流不到燕送君落日孤雲邊
聲名一日天下白還作高樓坐中客
西州自古多豪英作者凜凜氣猶生
太尉清風邁萬古不勞折箠笞此魯
男兒生不功名死無益莫言簿領卑
凡職君不見當時髯張一尉耳至今
雙廟令人起

魯直烏絲欄黃庭

太清虛皇玉景經琅函瓊笈祕始清囊以雲錦金
鈿扃四神守衛訶百靈中夜一氣存黃庭玄霜瓊

膏灌子形方瞳綠髮覓魄寧上壽千秋下百齡天
書夜降敕六丁控駕三素乘風泠鳳笙龍管超冥
冥揚旌抗旆燿飛星八威吐毒驅雷霆擲火萬里
流金鈴仙人拂石刳不聽笑視人世風中螢世間
醉夢紛臙腥三尸調汝丹田螟有如尾閭泄滄溟
一朝神離鳥飛銜涪翁書法出蘭亭名書此經實
自銘開卷恍然如酒醒養生新發庖丁刃

同粹中師賦梅

寒梅雪中春高節自一奇人間無此花風月恐未
宜不爲愛冷艷不爲惜幽姿愛此骨中香花餘嗅
空枝影斜清淺處香度黃昏時可使飢無食不可
無吾詩

游華山寄元裕之

我從秦川來遍歷終南游莫行華陰道清使明雙
眸東風一夜橫作惡塵埃咫尺迷巖幽山神戲人
亦薄相一杯未盡陰霾收但見兩崖巨壁插劍戟

流泉夾道鳴琳瑯希夷石室綠蘿合金仙鶴駕空
悠悠石門劃斷一峰出婆娑石上爲遲留上方可
望不可到崖傾路絕令人愁十盤九折羊角上青
柯平上得少休三峰壁立五千仞其下無址傍無
儔巨靈仙掌在霄漢銀河飛下青雲頭或云奇勝
在高頂脚力未易供冥搜蒼龍嶺瘦苔蘚滑嵌空
石磴誰雕鏤每憐風自四山而下不見底惟聞松
聲萬壑寒颼颼捫參歷井到絕頂下視塵世區中

囚酒酣蒼茫瞰無際塊視五嶽芥九州南望漢中
山碧玉簪亂抽況復秦宮與漢闕飄然聚散風中
漚上有明星玉女之洞天二十八宿環且周又有
千歲之玉蓮花開十丈藕如舟五鬣不朽之長松
流膏入地盤蛟虬采根食實可羽化方瞳綠髮三
千秋時聞笙簫明月夜芝輶羽蓋來瀛洲乾坤不
老青山色日月萬古無停轉君且爲我挽回六龍
轡我亦爲君倒却黃河流終朝汗漫遊八極乘風

更覓元丹丘

和淵明飲酒九首

翩翩萬里鶴日莫將何之昏鴉擇所安笑汝不知
時孔席不暇暖此理吾不疑尙愧淵明翁濁酒時
一持

貧賤豈不苦仰慕冥鴻飛富貴豈不樂乃有黃犬
悲苦樂各異趣嗜好從所依我欲作九原獨與淵
明歸挂冠不待年況此齒髮衰遙酌一杯酒毋令

寸心違

秋菊有至性霜松無俗姿采采黃金花笑撫蒼煙
枝偶有杯中物成此一段奇白雲南山來出岫復
何爲醉臥東籬下聊脫人間羈

今日好天色清晨雪雲開東風如故人適我平生
懷坐見南來燕孤雌與雄來莫歸主人堂梁間有
雙栖巢傾覆其子又補新巢泥翩翩隨陽鴈幽貞
苦難諧江湖偶相失咫尺雲路迷哀哀霜雪際獨

向胡天回

鷲鳥閉籠中舉翮觸四隅騏驥駕鹽車跼蹐困中
途雖然遭識拔未免爲人驅傍觀信美矣自愧良
有餘不如兩無累還我田園居

千載淵明翁誰謂不知道謾賦責子詩調戲以娛
老杜陵蓋自況亦豈恨枯槁壺觴清濁共適意無
醜好歸來五柳宅守我不貪寶長嘯天地間獨立
萬物表

幽居淡無事雅志了玄經眼花憎文字悠悠竟無
成中夜起不寐披衣守寒更梅竹散清影素月流
廣庭孤鶴閱逸響切切寒蟲鳴撫卷長歎息慷慨
惻中情

漢儒傳注學未爲世所得秦火少完書豈免烏焉
惑後儒補罅漏聖道少開塞俗士喜持戈又一秦
相國且共歡一觴多言不如默

淵明非嗜酒愛此酒中真謂言忘憂物中有太古
淳回首市朝中萬事牛毛新去年持使節悠悠過
西秦宮閣隨飛煙衣冠化埃塵當年憑軾士慷慨
歎徒勤所以山林客樂與魚鳥親西登太華頂曠
望長河津寄謝三山雲聊欲濫吾巾誓將從此去
笑謝當塗人

和韋蘇州秋齋獨宿

冷暈侵殘燭雨聲在深竹驚鳥時一鳴寒枝不成
宿

擬兵衛森畫戟

冠帶事朝謁清坐彈鳴琴以彼塵外趣遠我遺世
心岸憤送歸鳥隱几見遙岑聊同靜者樂豈必居
山林

寄王學士子端

寄語雪溪王處士年來多病復何如浮雲世態紛
紛變秋草人情日日疎李白一杯人影月鄭虔三
絕畫詩書情知不得文章力乞與黃華作隱居

上清宮二首

霜葉蕭蕭覆井欄朝元閣上玉簪寒千年遼鶴歸
華表萬里宮車泣露盤日上霧塵迷碧瓦夜深月
露洗荒壇斷碑膾炙人何在吏部而今不姓韓
暇日登臨近吹臺夷門城下訪寒梅鰲頭他日幾
人在尊酒而今一笑開秋潦滲餘村徑出夕春歇
處野禽來醉歸扶路人爭看知是詩仙闥苑回

寄陳正叔

全金詩卷九
三
渺渺西風去翼輕長林楓葉動秋聲
嵩邛競秀容
多可河洛交流忌獨清
廣武山川迷故壘成
臯草木闕空城憑高一掬英雄淚
寄與窮途阮步兵

寄裕之

久雨新晴散痺頑一軒涼思坐中間
樹頭風寫無窮水天末雲移不定山
宦味漸思生處樂人生難得老來閒
紫芝睂宇何時見誰與嵩山共往還

古餅臘梅

石冷銅腥苦未清瓦壺溫水照輕明
土花暈碧龍紋澀燭淚痕疎鴈字橫
未許功名歸鼎鼐且收風月入瓶罍
嬌黃喚醒朝陽夢漢苑荒涼草棘生

莫春得寒字

九日聊偷一日閒三分春事二分闌
鄉關夢裏人空老風雨夜來花又殘
乍拆泥封餽酒熟未聞火禁粥飭寒
却思投劾歸田去楊柳陰中把釣竿

靈感寺

徒河岸北白蓮東法鼓驚飛碣石鴻塏上風烟高
鳥路山頭雲雨化人宮松林礙日蜂房冷石砌頽
沙蟻穴空欲盡休公揮塵樂鬢絲羞對落花風

五月牡丹應制

好事天工養露芽陽和趁及六龍車天香護日迎
朱輦國色留春待翠華穀雨曾霑青帝澤薰風又
卷赤城霞金盤薦瑞休嗟晚猶是人間第一花

代州

金波曾醉鴈門州端有人間六月秋萬古河山雄
朔部四時風月入南樓漢家戰伐雲千里唐季英
雄土一丘繫馬朱闌重回首烟波誰在釣魚舟

開元寺

歲久開元寺黃花落石龍瓶深添碧甃蝸壁篆金
容窓影年年塔禽棲夜夜鐘平生睡秋雨竹閣味
偏濃

謁北嶽

四大神儀一群山太茂尊奠方荒冀宅視禮配天
孫西送虞淵莫東瞻碣石瞰寶符臨代郡鐵甕扼
并門控趙襟形壯包燕氣象渾九河探禹跡萬里
叫虞寬在昔登封始前驅羽衛繁千家駢部曲萬
騎隘山樊卜地恒陽曲移祠泰始元晉移祠
曲陽荒碑
刈歲月飛石礮乾坤帝秩加黃屋宮居象紫垣雲
楣朽芝瑞雨砌裂槐根天業恢弘大山靈翊衛屯
巫閭歸帝製長白發金源九廟龍盤接三邦地勢

吞雲烟浮近甸日月遶中原欵謁天香重封題御
署存銀鏐諸產富電雨萬靈奔神聽羞回德天聰
納正言負時身九死去國淚雙痕日近趨天闕生
還託聖恩許身徒稷契無術補羲軒帝籙長桑洞
仙巖張果村卜居如可近重整北山轅

陪李舜咨登憫忠寺閣

日月躔雙栢風烟納寸眸雲山浮近甸宇宙有高
樓鳥外餘殘照天邊更去舟登臨有如此況接李

膺遊

廬州城下

月暈曉圍城風高夜斫營角聲寒水動弓勢斷鴻
驚利鏃穿吳甲長戈斷楚纓回看經戰處慘淡莫
寒生

白鴈

波淨影逾白霜清鳴更哀乾坤雙鬢老風雪一聲
來林迴隱猶見天長去復回物情嫌太潔莫使羽

毛摧

桃花島寄王伯直

冰破村橋擁春寒旅鴈低遠山封霧小高浪與雲
齊島寺明松雪潮船濺藕泥詩情吟不盡寄與畫
中題

郎山馬耳峯

房駟落人間入石露雙碧月明聞夜嘶驚落山頭
石

春遊三首

無數飛花送小舟
蜻蜓欵立釣絲頭
一溪春水關何事
皺作風前萬疊秋
樹藏修竹竹藏門
門外清流幾股分行過
小橋人不見背陰
花氣隔牆聞
烟外絲絲風柳斜
春光已自到天涯
太平有象邨邨酒
寒食無家處處花

莫歸

貪看孤鳥入重雲
不覺青林雨氣昏
行過斷橋沙路黑
忽從電影得前村

清居寺五杉亭觀子野留題

五杉今日只三株
曾是詩人歎息餘
君去我來杉尚在
斷腸君歿見君書

雞鳴山

烟蒸山腹晴猶溼
河帶水漸暖漸流
獨上雞鳴看日出
五雲多處是皇州

盧溝

河分橋柱如瓜蔓路入都門似犬牙
落日盧溝溝上柳送人幾度出京華

雨晴二首

東風時送瓦溝聲欹枕幽窓夢自驚
睡起不知雲已散夕陽偏向柳梢明

一抹平林媚夕暉山烟漠漠燕飛飛
倚闌遙認天邊電何處行人帶雨歸

寓望

蒲根閣閣亂蛙鳴點水楊花半白青
隔岸風來聞鼓吹柳陰深處有園亭

戴花

病來杯酒懶重持強爲花殘折一枝
人老易悲花易落東風休近鬢邊吹

玉堂

玉堂陰合冷窓紗雨過銀泥引篆螭
萱草茱萸俱

不見蜂聲滿院採槐花

夏至

玉堂睡起苦思茶
別院銅輪碾露芽
紅日轉堦簾影薄
一雙蝴蝶上葵花

華山

石頭犖确水縱橫
過雨山間草履輕
未到上方先滿意
倚天青壁看雲生

雨晴

一春不雨漫塵黃
碧瓦朝來汎霽光
留得紫威花上露
幾招渴燕下雕梁

卽事

樓頭不見莫山重
遙認青林雨意濃
一陣風來忽吹散
斷雲還補兩三峯

同樂園二首

春歸空苑不成妍
柳影毵毵水底天
過却清明遊客少
晚風吹動釣魚舡

石作垣墻竹暎門水回山復幾桃源毛飄水面知
鷺柵角出墻頭認鹿園

繫舟山圖

裕之先大夫嘗
居此山之東巖

山頭佛屋五三間山勢相連石嶺關名字不經從
我改便稱元子讀書山

虎牢

兩崖峽束枕洪濤自古英雄爭虎牢蒼天胡爲設
此險長使戰骨如山高

御訂全金詩增補中州集卷十

金元好問原本

趙秉文二

共五百三十五首從滏水集補入

雜擬

朔風厲嚴氣玄雲結層陰霜雪被原野行李寒駸
駸躑躅獸強顧驚鳥辭故林路滑跼峻坂緣雲上

全金詩卷十
一
嶽峯挽藤斷人跡反畏蹙然音藜藿不克腸况乃
饑飈侵開門望晴霽白日冑照臨不憂凍餒逼所
懷四海心聊興漆室歎不待雍門琴

猗猗竹與桐並生江之溇朝日照孫枝夕風振瑤
林鳳凰天外來飛下玉山岑棲枝食其實氣類無
幽深夔倫不世出斤斧倘見尋一截嶰谷管一製
薰風琴偶蒙識者賞無窮出清音

空齋日無事起坐橫鳴琴明月入我牖照見萬古

心古風不復還中有太古音置琴挂壁上吾道無
古今

戚戚去故里辛苦從軍行黃沙翳白骨麟閣誰功
名西北秋風至日莫愁雲生火燒白草崗水斷黃
河聲天寒馬屯縮仰天爲悲鳴男兒貴死難義重
鴻毛輕南登彫陰坂北望驃騎營注馬千丈坡射
鵬萬里程

西北有高城來往交河道古來征戰地白骨埋秋

草人壽似金石生男不待老不敢上譙樓唯恐愁
絕倒

秦時築上郡漢家事西鄙邊兵塵雨雪漲黃河
水千秋百歲後魂魄來遊此一誦古戰場悲風來
萬里

豪斟巨炙排九楹玉盤醪醑一再行秦王高歌趙
王瑟屬車天遠邯鄲城侍臣冲冠髮直指秦庭虎
賁劍鋒倚咸陽山色如死灰邯鄲霸氣清於水引
車還避將軍路蕞爾那能持兩虎君不見世間男
兒健如虎一旦焉知不如鼠

秋日郊行

瘦馬兀西風節物遽如許雀噪晚禾場蝶飛秋菜
圃桑枯竅呼風槐老皮溜雨聞聲不見人隔林搗
社鼓

初望少室

好山如佳士洗盡名利塵對之歛衽敬可愛不可

全金詩卷十
三
親一水刻我骨一石融我神何況三十六峰峰與
天隣仰看青礫礫俯矚白磷磷因之携畫本試寫
蒼然真三日宿其下砥筆不敢皴歸來閉閣臥枕
上山橫陳題詩追所見何必如古人

盧巖

龍潭繞石壁鳥道盤青蒼飛泉從中來聲落讀書
堂左右灑石壁石上含宮商尙疑盧徵君醉騎白
鸞翔至今明月夜飛下青山長去之五百載丘壑

道愈光舉瓢取此水清風益難忘

龍門

洛陽三日雨不見龍門面流水入野田歸雲抱幽
巘因尋商山眠遂就石樓飯山川宛如昔白傳不
可見

過陸渾

言從陸渾去不遇紫芝還鳥飛不盡處夕陽千萬
山雲起動兼靜水流忙更閑坐待石上月滅没烟

嵐間

此詩溘水集古律詩并收

至日感事

人言至日一線長我覺至日一線短縫新綻舊不如昔身上衣猶慈母線昨日日短猶可長今日衣敝不可綻年年至日壽北堂親不在堂衣在眼

遊玉泉山

夙戒遊名山出郊氣已豪薄雲不解事似妬秋山高西風爲不平約畧出林稍林盡湖更寬一鏡涵

秋毫披雲冠山頂屹如戴山鼇連旬一休沐未覺陟降勞高談到晉魏健筆凌風騷玉泉如玉人用舍隨所遭何以侑嘉德酌我玉色醪

陪趙文孺路宣叔分韻賦雪

堂堂翰林公清癯如令威雪花對尊酒浩氣先春歸一還天地素平盡山川巖松竹瀉清聲窓戶明幽輝呼童設茶具巡簷收落霏清寒入詩腸思遶昏鴉飛力除鹽絮俗改事文章機後生那辨此顰

全金詩卷十
五
眉正宜揮請看西溪老傳作東坡衣

岢嵐賦雪分韻得素字

閉門三日雪荒城甚無趣土屋多半頽雞犬迷牖
戶雲端高青熒天色易晚莫寒迷日車轍清絕坤
維柱泉藏凍虺蟄松摧老蛟怒餓鳶嚇癡雛饑鴈
跡寒兔野人市樵蘇不辨入市路蹇驢跼峻坂愁
見冰河渡陽衰理必復天地豈終沍佇看黃雲晴
飛屑落高樹

望北山雲

浮雲起太行六合須臾間清風相汲引吹我渡榆
關歲早不成雨悠然歸故山向來無心出亦復無
心還

井陘韓信廟

朝涉滹沱流驅馬望太行莫投井陘宿僕痛馬玄
黃地瘠靳春色山高易夕陽莫天飛鳥盡佇立向
蒼茫

全金詩卷十
六

漸臺行

齊國有四殆漸臺空五層臺城膏血盡鬼力猶不
勝浮雲一蔽臨淄君君王左右多青蠅嫠婦不卹
緯祀國憂天崩任從笑掩侍人口仰天大撫列女
膺一言反掌易春風愛淄澠吳楚各千里飛鳥不
敢凌越以西子亡齊以無鹽興醜興而美亡未易
定愛憎請君寶此圖觀國如延陵

秋懷次高叅軍韻

秋風蕭條秋氣傷歲云莫矣思故鄉客行來歸正
落木雁飛不下空斜陽白草崗頭風似箭黃沙戍
下月如霜聞君近有從軍作愁思與之誰短長

三五七格

秋風清秋月明白露夜深重白雲秋曉輕夢回酒
渴呼童起枕上轆轤三五聲

倣嚴武臨邊

少年騎馬耳生風老去羞無汗馬功落日秋風心

尚壯令人回首望雲中

遊箭山

天風吹雪下平田紛紛逐馬銀杯翻何處清風搖
玉鐸興來不覺過青山山山可望不可攀長河鏡
裏開烟鬟浮雲不見山頂相想是落日孤雲間箭
山峰頭望碣石東南海水不可極六龍賓日半海
紅長鯨駕浪掀天白萬峰回合處九折十三盤一
溪初入山百轉萬壑度盡松聲寒老苔萬古帶石

色枯松倒植蒼苔裂石門劃斷一峰開猶向雲端
眺青壁不見長安許道寧披麻誰繪倚天青天上
謫仙金鑿客削瓜詠此晴嵐碧眼前安得此突兀
想像造化初開闢詩人以來幾人到只說終南與
嵩少他年騎鶴歸蓬萊仰天却笑箭山小

傲太白登覽

扁舟過海島風便一日耳咫尺不可期波濤四千
里揭來雞山下共浴桃花湯洗盡塵土骨心期雲

水鄉夜夢掛席南斗傍金山寺影水中央海雲噓
蜃化樓閣撞鐘擊鼓聞海陽施食狎鷗沾法味啣
花馴鹿散天香夕陽萬頃鷓沒處水脚天影青茫
茫臨風朗詠太白句鳥飛不盡吳天長海山道人
種白玉碧眼方瞳照巖谷遺我天書三十六糝糊
塵眼不可讀醉乘天上紫玉麟銀河倒浸扶桑新
麻姑兩鬢垂秋霜人間陸海變耕桑歸來笑撫靈
松下春風幾度桃花香

問山懸巖寺觀宇文公吳東山題名

幽州之鎮醫巫閭襟帶遼碣吞玄菟誰開青壁一
萬丈坐我陸海之方壺有泉聲而飛有松實而腴
雲烟出沒隨朝舖三百六十古精廬望海寺前列
幢蓋鎮山亭下羅笙竽廣寧太守來肩輿今日之
遊差樂乎問而不答心語口高士例與山相娛壁
間題詩亦髣髴記是詩人高蔡吳山僧睨壁笑問
吾他山還有此客無黃華老人醉騎驢向天亦藐

懸巖圖

海月

東方雲海何所無千奇萬怪雄牙鬚風腥雨鹵懶
下筋盡與海月爲僕奴滄波萬古照明月化爲團
團此尤物混然別有一太虛七竅不施斤斧力不
辭支解克君須照君胸中五車書清光半食入肝
肺雄文徑欲誅蟾蜍一經上下波心白幾誤謫仙
淪醉魄爲君掛席拾滄溟海嶽樓頭斫冰雪

松糕

嗟嗟千歲姿不比明堂蒿膚裁三韓扇液製中山
醜皮毛剝落盡流轉到松糕髯龍脫赤鱗三日浴
波濤玉兔持玉杵搗此玄霜膏文章百雜碎肪澤
滋煎熬殷勤小方餅裁以鞍畔刀味甘剖萍實色
殷煎櫻桃遼陽富冬菹盤饌窮溪毛巧謀一飽地
藿粉不我逃腹中十八公笑汝真老饕未忘口腹
累尙似賢蒸羔真休若硬老家風大孤高聊將酥

蜜供調戲引兒曹多生根塵習馬求勝珍庖一舌
有多智無乃綿蕞勞人間無正味嗜好隨所遭安
能知許事爲君續離騷

霜葉

天工設色繪雲屏山光擘破烟嵐青夕陽閃閃見
鴉起晚風蕭蕭吹客醒林間老僧倚瘦藤一枝秋
水冷金瓶日莫千巖秋影裏紛紛吹落讀殘經

遊紫霞山

共聯塵外鑣薄遊西山寺夕照返河山秋容滿天
地霜風失故綠顏色少姿媚黃花似吾衰紅葉如
人醉病來不舉酒得意同此味纍然似空尊酒盡
同棄置

題大令冠軍帖

君不見長安城中未寧里玉軸牙籤散城市流傳
人間知幾姓墨蠹老蛟蟠不死怪君何處得此本
上有大令冠軍字嗚呼真贋久不辨咄咄逼人皆

李衛至今淳化二王帖多是唐人所臨硬黃紙想
當盤礴下筆時睥睨九原呼欲起以燈取影見面
觀心知不言識形似長沙無人賢郡亡後來作者
不到此何必更問當年誰吾言久已經平子

黃山
云懷

素所
臨

人日遊西山寺觀謝章壁畫山水

蕭寺荒堂三五間謝章滿壁畫江山天涯霜雪少
春意一日携酒開心顏饑禽穿窓啄官粟歲久刑

墻樵指禿山僧送客不關門寒雲夜夜飛來宿

擬李長吉擊毬行

錦鞮珠絡四百蹄繡胸嵌花雙後猊分曹入場鼓
聲作月趲流星馬前落側身下臂疾鳥回霹靂一
聲龍門開玉鞭笑擊金鐙響綠鞵齊出黃金枝臨
堦下馬坐廣亭玉盤行酒跪輪朋蒼頭上馬抱黃
帕一點飛塵夕陽下

歲莫言懷

歲晏多北風塞向臥南壁龜紋羃紙帳規以安我
室宇宙豈不寬盤薄入容膝窓明讀易朝月冷談
道夕風箏偶成韻一笑副終日嚴城傳夜柝曾是
非戍役驚飈動河漢原野曠蕭瑟積陰蕩寒氣歷
歷星斗白龍鍾感歲換留滯眇天北懷昔獨悲辛
乾坤同寥閬

冬至

小時逢冬至夜半叩鄰里及今老無事却呼童稚

起坐深朋友敬甚矣吾衰矣笄女將及人吾衰固
其理行年四十二始有此兒子未知賢與愚懷抱
差可喜嚴冬霽霜雪風日稍清美一醉忘其家頽
然枕琴几

重九登會禪寺冷翠軒

北風吹倒磨雲峰凜然雙角蟠白龍邊城雪花大
如席黃花紅葉誰爲容會禪西軒作重九登高望
遠開心胸烟嵐卷盡莫山碧冷雲萬里迷玄鴻山

全言卷十
北花豬大如馬割鮮飲食如長虹酒酣起舞望兩
寺鳥驚踏雪摧長松天低日落望不盡一徑何處
來樵蹤君不見七金山下打圍處貂裘風帽寒蒙
茸跑風駿馬下平野迎霜老兔咻榛叢歸來得雋
託朋友臨風一飲輕千鍾歡餘勝地兩蕭瑟百年
聚散如飛蓬明朝却望登眺處城中唯見白雲封
題東坡眉子石硯詩真蹟

東坡袖裏平原手忠義胸藏筆發之世俗臥筆取

妍媚書意乃似東鄰施何曾夢見麒麟兒天骨不
似駑駘肥傾囊倒軸精妙乃如此世間惟有眉子
石硯吾家詩

風琴堂

我家琴寫風入松君家風琴惟隱几月明天籟自
宮商何處安排君十指風動龍吟自不知無經底
處覓成虧世間真樂類如此但恐此聲非此耳

聽雪軒

水花吐琅玕窓外留半月蕭然煮茶興似倩此君
說玉龍臥無力時送窓紙濕夜久沈無聲風枝墮
殘屑

遊崆峒山

圓方相涵浩無窮巨細長短相形中至人遺形立
於獨直與天地相始終不離汾水見姑射心知何
處非崆峒惜哉小智聞道晚強以耳目尋遺蹤去
城三十里而遠其下問道軒轅宮綠雲一逕羊角

上忽得平壤羅諸峰悄然坐我白茅室目所未擊
神已通青山爲身澗水舌賓主相對森談鋒是中
無問亦無答一墮觀聽真盲聾何人意得乃忘象
豈必日月推屯蒙叅雲亭西山更好下視落日低
金容歸來秀色艷眉頰夢駕萬里西飛鴻

題楊秘監畫馬

楊侯詩人寓於畫後身韓幹前身馬驂騮萬匹落
人間一紙千金不當價曾貌先帝麝香驄紙上飛

出天池龍至今畫史比良樂一洗萬古凡馬空時
手畫皮歎奇蹟三百年來無此筆艱難常恨少神
駒掩圖獨抱龍媒泣

靈巖寺

泰山天下山方山屹相對何時巨鼇趾中斷神斧
快遂令齊與魯劃若中作界陽坡青礧礧陰崖白
確確衆峰如環城盤盤一都會一逕入靈巖十里
行竽籟飛泉何處來石梁納高派金碧闕精藍未

到氣先邁鐘魚集萬指陳迹向千載何人僧伽藜
入壁了無礙君豈知道證此身不壞異類服猛
逸草木動光怪信知像教力超越範圍外年來筆
墨廢政坐耳目隘不行萬里脚恐負三生債濟南
山水窟巖寺風煙最乞我一把茅飛身入圖畫

江岸艤舟圖

遠村樹如薺近岸舟如月孤舟泊沙尾危檣見木
末前山景氣佳日落涼風發時有渡頭人蕭蕭吹

素髮

香山飛泉亭

霜風吹林林葉乾泉聲落日毛骨寒道人清曉倚
欄干自汲清泉掃紅葉一菴冬住白雲端

東坡赤壁圖

連山盤武昌古木叅雲稠誅茅東坡下門前江水
流永懷百世士老氣蓋九州平生忠義心雲濤一
扁舟笛聲何處來喚月下船頭掬此月中水簸弄

人間秋蕩搖波中山光中失林丘古今一俯仰共
盡隨蚍蜉孫曹何足弔我自造物遊尙憐風月好
解與耳目謀歸來玉堂夢清影寒悠悠一顧能幾
何鶻巢淹不留遺像不忍掛尙恐兒輩羞儼然袖
雙手妙賦疑可求何時摘仙人騎鶴下瀛洲相期
遊八表一洗區中愁

伯時畫九歌

楚鄉桂子落紛紛江頭日莫天無雲烟濃草遠望

不盡翩翩吹下雲中君九歌九曲送迎神還將歌
曲事靈均一聲吹入汨羅去千古秋風愁殺人

倣張志和西塞

一葉黃飛一葉舟半竿落日半江秋青草渡白蘋
洲歸路月明山上頭
白頭波上白頭人黃葉渡西黃葉村山幾朶酒盈
樽落日西風送到門

楊秘監秋江捕魚圖

山蒼蒼江茫茫鳥飛不盡吳天長潮平漲落洲渚
出秋風幾舍鱸魚鄉漁郎聚魚鳴兩槳輕舂觸破
青山浪修鱗出水玉叅差晚日搖光金蕩漾長林
無聲楓葉丹清波不動江水寒誰令此圖落塵土
乃是楊侯造化之筆端我披此圖四十載老去而
今重見畫空留名字落人間當日題詩幾人在漁
人走利士走名得失與魚相重輕笑把綸竿渺滄
海浩歌直欲膾長鯨

支遁相馬圖

支郎天機深世故一馬中向來蔬筍氣寓物一洗
空眼前無騏驥遠目送歸鴻僧中有良樂萬里籟
雲風

逢李按察

豫章蔽牛馬郢匠斧以斯太阿斷犀象補鞋不如
錐君子識其大不爲流俗移青雲自茲始功業當
及時

全齊十萬戶繡衣副儒臣往時佩犢者今日扶犁
人潛魚遊青波脫兔思荒榛賢哉渤海守盜賊皆
吾民

漢儒事章句去道利乃倍桓譚謂子雲此事今獨
乃岱嶽小天下齊魯復何在會當登日觀一日了
滄海

好酒無深巷急足無善蹟一僞喪百誠中和爲士
則澤中一方鏡解引萬里色往時王廣道山東化

遺德

堂堂竹溪翁如天有五星篆籀深魏漢文章倣六
經後生翫華藻骯髒媿白青善哉劉與李斯文見
典刑

西方有佳人貽我白玉琯吹之和八風元氣生虛
窾翩翩兩青鳥云是王母遣天長道路濶音信何
由展

皎皎霜雪練寒女機中出織成天吳鳳被之臧獲
質如何窮鄉士九月猶絺綌不見王逸賓抱窮守
空室

君侯下車日百城風凜如公餘一炷香谿山奉宴
居治要無多言所貴一字虛所以曹相國不讀城
旦書

本心如水鏡功名時翳之少年塵累盡萬象復在
茲水冷知天寒絃高覺柱危世無齋心友誰知此
襟期

二豪角談鋒氣湧胸中山達士兀無言雙手縮袖
間理勝是非遣道在禽魚閑回也真不愚高風藐
難攀

春水行

光春宮外春水生駕鵝飛下寒猶輕綠衣探使一
鞭信春風寫入鳴鞘聲龍旂曉日迎天仗小隊長
圍圓月樣忽聞疊鼓一聲飛輕紋觸破桃花浪內
家最愛海東青錦鞬掣臂翻青冥晴空一擊雪花

墮連延十里風毛腥初得頭鵝誇得雋一騎星馳
薦陵寢歡聲沸入萬年觴瓊毛散上千官鬢不才
無力答陽春羞作長楊侍從臣閑與老農歌帝力
歡呼一曲太平人

涿郡先主廟

炎燼終四百海飛羣雄奔蛟龍離舊隱豺虎瞰中
原仗義公天下豈料中山孫艱難拒赤壁顛沛乞
荆門劉郎非嬌客肯市一女恩譬如韝上鷹旣飽

則飛翻山陽公安在灑淚西南坤區區一隅地鼎
立事雄尊滅魏壯圖屈窺吳遺恨存嗚呼永寧宮
慷慨臨終言老瞞安足雄死面覘奸魂仁與不仁
耳成敗何必論天乎未厭漢河洛不足吞盜子復
爲盜丕乎猶子元等爲一國亡善惡終不諼

當時五丈桑墻頭搖羽葆草木尚有情人心不如
草緬懷車蓋翁三顧隆中老乾坤一草廬鼎足事
已了艱危奉命際流涕出師表一時會風雲千古

事蘋藻野農復何知尚說官家好筮卜傳神語瓦
釜薦苻潦瀘水耕餘村范陽行處道天留西日遲
地狹東風早風霜慘燕鴈歲月愁蜀鳥亦復梁父
吟塵埃驚潦倒

扈從行

馬翻翻車轆轤塵土難分真面目年年扈從春水
行裁染春山波漾綠綠韉珠勒大羽箭少年將軍
面如玉車中小婦聽鳴鞭遙認飛塵郎馬足朝隨

鼓聲起暮逐旗尾宿樂事從今相繼躅聖皇歲歲
萬機暇春水圍鵝秋射鹿

從帥府謁太清宮

層宮枕蒼陂地迥風日冷旌旗隱復見原陸互馳
騁悠悠塵外趣窅窅壺中境山川蒸淑氣草木闕
清景周疆有楚宋漢肆列鐘鼎尚矣千歲檜荒哉
九龍井懷竒日以擊契冥心獨省悲歡萬古促賞
晤一日永清波獲魚尾落日頰牛領天寒鷹隼擊

水落鴻鴈影白日照征夫青天入漁艇洗兵江漢
清茲焉事幽屏

遊醉翁亭

一逕入幽谷磴迂景更延陽光時翳竹石色寫冷
泉不見琅琊寺心知白雲邊殘僧戀幽景斷臂初
非禪歲莫少風雪回祿海內有此亭奪去
寧非天中有不壞者斷碑猶宛然逋民半吳越過
客多幽燕樹根落斷崖聊掛從軍鞭烏啼空落日

野色愁寒烟月上人歸盡山空水濺濺

陽冰篆

護書如護兒救燎如救飢可笑亦可憐似高還似
癡爲此陽冰篆法傳丞相斯長楸蹙騏驎快劍斬
蛟螭瑚璉祖廟器袞冕巖廊姿夜光含圭角春水
變華滋觀物獨寫妙苦心人得知入石疑無筆妙
處君獨窺廬陵千載人笑此尤崛竒一旦隨灰燼
世疑山澤肥成壤固有數惜哉徒爾爲永成吾不
預旣壞那可追當其將壞間萬一神護持一物尚
不忍其餘可類推乃知放麈翁仁心不吾欺

送墨李道士元老

嵩山到嵩陽相望二百里數驛走商嶺兩崖夾伊
水飛烟空翠間前路轉多山雲橫碧嶂斷雁沒青
天還鳥鳴青山上人行修竹裏犬吠得柴荆花落
鳥驚起草荒摩詰墅火斷魯山碑昔疑王家畫今
信謝公詩其中一道士生計蒼烟 松下讀道經

窗間寫周易相看斗南北不見十年餘重尋化鶴
夢要寫換鵝書雲間侍玉皇日下瞻天表歸去秋
海邊乾坤一壺小君歸我正病病起霜滿鬚尚能
持酒否還憶寄書無遙知鳴臯下尚有蒼苔迹讀
我往年詩因之拂塵壁

送李天英下第

天雞拂滄溟萬里起古色南風搖冷雨歸興生羽
翼二年客京華一第爲親屈文字天地仇風雲囚
霹靂鸞皇望霄漢騏驎絆荆棘蹭蹬升天行白雲
繫胸臆遙憐弟妹長摩頂今過滕人生在家樂絕
勝長爲客老夫懷抱惡數日臥向壁胸中畧雲夢
眼底無敵國雲歸北海後鳥沒青山夕日斷東北
塵茫茫如有失

御訂全金詩增補中州集卷十一



御訂全金詩增補中州集卷十一

金元好問原本

趙秉文三

與龐才卿雨中同遊太寧山

羣山西來高崔嵬太寧萬疊屏風開半天截斷參
井分夕陽不到吟詩臺

寺有吟詩臺馮瀛王寓筆研於此

近都形

勝甲天下況此萬斛藏瓊瑰青蛟百道走玉骨下
赴僧界如奔雷泉聲夜作雨飛來冷雲滴破烟嵐
堆拍梯可望不可到石鱗冷骨粘莓苔塔上一鈴
時獨語慎勿促裝遽如許徑須携被上方眠明日
顛崖看懸乳寺後一峯高更寒歸來駐馬更重看
蕭蕭易水寒流廣蒼茫不見雲中山西風栗葉高
陽道淡淡長空沒孤鳥荆卿廟前濕莫螢昭王臺
畔霑秋草擬豁千秋萬古愁更須一上郡城樓西

山應在欄干外往月時空浩蕩秋

和淵明擬古

亭亭澗底松婉婉窗前柳穠華能幾時不耐風霜
久感君傾意氣遂托金石友膝上橫秋霜中筵列
杯酒酒明相知深劍明終不負時運有代謝交情
隨薄厚寄言歲寒姿枯榮復何有

停杯且勿飲劍歌已三終男兒重意氣結髮早從
戎生當爲世豪死當爲鬼雄驚沙射人面日莫來

悲風空卷冒強敵力向陰山窮仍聞霍嫖姚萬騎
出雲中

客從遠方來氣貌克以完鞍馬光照地怪我儒衣
冠問君何苦心所慕惟孔顏古豈無賢豪十六子
八關獨携無賢子流盼青雲間芝蘭吐幽芳山水
發清彈願爲九臯禽接翼萬里鸞揮手欲謝客所
懼非饑寒

清清一本蘭俟時吾將採不採庸何傷香色終不
改太陽頽西泥明月生東海日月如飛梭榮華不
相待寄言紉佩子無貽後時悔

重午遊冠山寺

南風搖百草吹我遊山樊青山暎華髮似我頭上
冠長松五月窓戶闕終古不散蒼雲寒步出喬木
杪俯視林下鞍飛亭枕爽塏更覺天宇寬憑高送
遠開心顏白雲青嶂非人間深林冥冥白日莫飛
鳥喬喬長空閑夕陽萬里開野色晉趙形勢空河

山時清老守容癡頑臨風把酒遺中綸明朝却望
題詩處城樓惟見烟中竿

七夕與諸生遊鵲山

七月七日人間秋興來飄然鵲山遊靈仙役鵲渡
河去白雲嶺上空悠悠手持雲腴酒與雲更獻酬
雲旣不解飲且可與子消百憂

闕

無聲非無聞聲向根極生隱几以眼聽嗒
然遺其形少焉性空水靈臺湛虛明從渠童子見

擲瓦戲清泠

南麓畫華清宮圖

天寶遺事今幾年華清樓殿非人間五家羅綺隘
山谷驅入尺紙天工閒碁分繡嶺線涇渭人物微
茫纔位置想當睥睨下筆時兩眼猶能書細字乃
知棘端可以造沐猴巧奪造化非人謀胸中度世
乃吾事坐令千里當雙眸明皇初心小堯禹肯比
金陵一孱主一盼聊爲妖姬留奈何坐此覆神州

太白西去有鳥道蜀山秦樹令人老浮雲一蔽漁
陽城祿山馬飽宮前草恩流四海一玉環敵人不
合窺潼關至今脂澤下蟾口時有飲鹿疑神奸豈
知水洗凝脂滑一掬傷心馬嵬血多年鬼火化爲
碧還達離宮送行客龍巖幾度過華清筆端山高
水泠泠嗚呼興廢今已矣祇有丹青留典刑

鷓鴣

臯落秋風莫深崖得爾鷓鴣他時萬里翼天末片雲
孤何處三窟兔古城千歲狐佇翻壯士臂飛血灑
平蕪

遊晉祠

官閒屏騎從意行無澗崗青山盡處山口轉清溪
宛與青山長古城尚隔叔虞廟水氣先入軍衣涼
溪行不十里喬木森千章靈泉萬古流不竭蕩雲
沃日搖精光素月落圓鬢青天入方塘櫂歌中流
簫鼓發擊汰驚起雙鴛鴦脚踏船舷腋兩生明月

照我欹巾裳兩生爲我歌與子嚼一觴興來灑墨
三四行使汝名似 輩香歌罷忽惆悵欲歸且徜徉
清風明月本自無盡藏青山綠水何處非吾鄉
世間風波老可畏物外日月初不忙安得此溪化
作百斛酒狂吟大醉三萬六千場一朝忽騎赤鱗
去歸來晉溪流水依舊空茫茫

遂初園

人生衣食爾所適飽與溫逮其得志間歸心負初
言少壯慕富貴老大憂子孫此心本無累利欲令
志昏嗟我復何爲未能返丘園物外恐難必開圖
對一樽

歸愚莊

平生功名心世路多崎嶇年來忝聞道何者非夷
塗莊後桑百本莊前芋數區草屋三四間榆柳八
九株僮僕足使令雞犬應指呼商鈕向我言官豈
不足歟如何天壤間不容七尺軀忘身百事懶忘

心一物無忘已又忘物兀然同大虛不皦亦不昧
無毀亦無譽不向醉鄉醉卽歸愚谷愚

閒閒堂

天運如轉轂日月如循環人生天地內頃刻安得
閒所貴心無事心安身自安低頭拾紅葉仰面看
青山朝聽新泉響暮送飛鳥還清晨了人事過午
掩柴關高非出天外低不墮塵寰花落鳥聲寂我
處動靜閒

翠貢亭

修竹百十箇老柏四五行日出烟霧散露葉翻晴
光時携一壺酒來此據胡牀鳥啼白日靜花落春
風香君看蒼翠間法身露堂堂卽物元非真離物
又非忘掩卷忽而笑風枝奏笙簧

佇香亭

今辰復何辰幽花滿中園愛此風露香聊佇屐齒
痕花殘蜂蝶逝花開蜂蝶喧物理有代謝花枝獨

無言無言還有情似訴誰空樽今我不爲樂知有
來歲存呼兒具瘦杓喚妾傾瓦盆且盡一日歡萬
事不復論

琴筑軒

琴筑雖有韻不鼓則不鳴流水無徽絃使我神慮
清風月爲節奏是中無虧成聊將不俗

以下
闕

跋武元直漁樵閒話圖

兩翁久忘世木石以爲徒偶然相值遇風月應指

呼廢興非吾事胡爲凡區區但覺腹中事似落紙
上圖一以我爲漁神遊渺江湖一以我爲樵夢爲
山澤臞形骸隨所寓何者爲真吾尚忘彼與此况
復朝市娛西風下落日渡口炊烟孤無問亦無答
長笑歸來乎

就劉雲卿第與同院諸公喜雨分韻得發字
君家南山有衣鉢叢桂分香老蟾窟從來青紫半
門生今日子孫牀滿笏爾來先生復秀出論事觀

書眼如月豈惟傳家秉賜彪亦復生兒勗勗勃往
時嘗乘御史驄未害霜蹄聊一蹶雙鳧古邑試牛
刀百里治聲傳馬卒今年視草直金鑾雲章妙手
著揮發老夫當放一頭地有慚老驥迫霜鶻座中
三館盡豪英健筆縱橫建安骨已知佳會得四并
更許深盃辭百罰我雖不飲願助勇政要風燈照
華髮但令風雨破天慳未怕歸途洗靴鞢

九日登繁臺寺

九日獨何日寒花發幽芬波澄無餘滓天清廓遊
氛鷗盤翼迅風鴻響厲層雲我與二三友意適同
酣醺南登歌吹臺一弔信陵君捐軀赴趙壁談笑
却秦軍夷門今安在草沒侯嬴墳我亦感激士白
首羞論文禁中有頗牧慷慨志奇勲登臨送將歸
無爲愴離羣蒼茫視八極烟靄何紛紛懷士托長
劍悵然日西曛

伯勝九日詩蕭然有陶風趣次韻

九日獨何日高懷無與娛仰視天宇清倏見飛鴻
孤哀嗚呼其羣相望邈江湖豈不念親友林間置
樽壺不醉慎毋歸且莫歌驪駒今日不爲樂奈此
歲將徂風霜艷黃菊興與南山俱此時如不採但
恐隨樵蘇日莫登吹臺蒼茫望八區翻然念鄉國
北望一長吁

倣玉川子沙麓雲鳴硯屏爲呂唐卿藏

吾聞春秋紀年二百四十二不書祥瑞書災異不
知何年沙麓崩六鷁退飛失其四恆星不見夜有
光星殞如雨石在地孔子諱魯不諱宋但記有月
食之旣豈知淪影入石中蟾蜍桂影俱蒙籠初疑
日中有兩鳥雙飛跳入姮娥宮鶉火賁賁尾伏辰
狀如赤鳥雲非雲女媧煉就五色石搏沙斫作愚
下人史蘇發占又端策坎爲白月艮山石兌升而
雲離奮翼重兌爲呂歸有德呂侯寶石到子孫更
遣趙子窮其源齊趙馬牛不相及如何窮此造化

根世間萬事何不有耳目之外難具論海中時時
發火焰世界一一持風輪一微塵內細須彌有頂
天上猶崑崙併却咽喉與唇吻別有一句超乾坤
木人撫掌非耳聽石女懷胎

扇子築著帝

釋鼻鯉魚驚翻東海盆吾言非夸子夸矣要與摩
詰無言

闕

傲樂天新宅

吉凶翻復兩何如新貴移來舊貴居昨日弓刀圍

舊宅今朝車馬慶新除兔驚尚顧罝中兔魚逸還
尋罩下魚富貴貧窮皆有命大都覆轍戒前車

傲郎士元寶刀塞上兒

長安美少年白馬黃金鞭後騎捧長劍官儀如殿
前烟塵生絕塞烽火照甘泉如聞辭第將遺貌上
凌烟

從軍行送田琢器之

巖風吹霜百草枯塞外馬肥思南驅長戈飛鳥不

全金詩卷十一
二
敢度扼吳嶺下行人無鈎鈐一夕妖星過賊臣自
掣居庸鑰藏金郿塢未厭深長安三日燃臍火北
兵數道下山東旌旗絳天海水紅北人歸來血飲
馬中原無樹搖春風橐駝車載金帛城上官軍
宜嘆息纍纍婦女過關頭回望都門心斷絕漢家
公主嫁烏孫聖主重戰議和親北望 地名 一舍如
天遠黃沙茫茫愁殺人田侯落落奇男子主辱臣
生不如死殿前畫地作山西請以義軍相表裏恨

我不得學李英愛君不減侯莘卿子明又請當一
面禁中頗牧皆書生橫遮俘屍三十萬潼關大笑
哥舒翰三書慷慨請長纓臨風鍛翮空三嘆

題楊祝監風雪曉裝圖

林空月已沈雪落風未掃束裝事晨征之子涉遠
道心知馬上人萬象入腹藁髯奴亦可人行李伴
幽討塵中無此客風雲滿懷抱逢辰則伊呂不然
商山皓如何苦憔悴薇蕨不得飽前身孟浩然後

身窮賈島三生紙上形千古笑枯稿向來富貴骨
露濕原上草百年等一夢翻覆無醜好那知風雪
癯不是蓬山老所以邢和璞一笑幾絕倒

試院中愁坐叔獻學博忽送紅梅小桃數枝
坐念春物駘蕩西園開鑰不得一觀作詩破

悶兼簡張文學仲山

數日天氣殊未佳文書如山眼生花忽遣官梅入
吾室政爾東君解留客蠟梅無韻空有香紅梅亦

復清而莊此花韻勝開較晚天許風流嫁海棠海
棠春驕睡未足環兒酒暈紅潮玉不應更有林下
風翠袖天寒倚修竹銀瓶亦有小桃枝茜裘游女
窺荆籬青枝綠葉不須問自有月影溪光知冰花
不肯相媚嫵來伴詩人作詩苦橫斜影落水心中
融入詩中作奇語古來詩人例多窮把酒對花酒
已空亦知寒食只數日醉夢不到西園中天上公
子被花惱一笑回波嘲栲栳不須區區索酒錢但

可煎茶對花前

慧林賦海棠

君不見三郎花下吹觥栗寧王搦管幡綽拍一聲
驚破夢華清海棠頓覺無顏色又不見百花潭北
西郊路醉裏花仙覓奇句覺來酒盡花已空詩人
不是無心賦梨園富貴春蕭瑟空對畫圖三嘆息
杜陵誰有補亡詩坡仙詩中畫更奇君不見西園
往日稱繁雄羅衣不復能春風雄樓傑閣春色裏

溫馨淑氣月明中纖條嫋嫋春無力猶遶空墻絆
遊客不應折贈寄僧房來與幽人慰岑寂石門老
衲僧中癯鼻端苦覓香有無何似東菴人散後月
斜踈影照跣趺

冷巖行

堯山堂外紀司馬永真金宗室時稱賢宰相自號冷巖周昂亦有詩

禪房閣雨鎖春陰幽人切切鳴幽琴一聲兩聲風
蕭森三弄五弄天沈沈紛綸十指終不亂雙鸞對
舞揚哀音初爲湘靈怨再鼓別鶴吟絃聲按抑止

復作忽然變態窮噓歎曲終從容奏恬淡落花啼
鳥青春深苗夫子吾獨知爾心胡爲翻作冷山操
此意似欲爲師箴昔年憶侍明光宮曾以絲桐沃
舜聰薰風一曲巖廊靜萬國無爲至化中明昌有
道真重瞳重瞳左右多夔龍朝廷詔起冷巖公鼎
湖龍去弓劍空不聞天寶相國忠漁陽馬嘶旌旗
紅聖主中興日月功首誅羿浞鉏羣克張公上書
見大計臣以琴諫非琴工先生年來到骨窮但願

四海無兵戎夜闌更請彈三樂臣獨饑寒亦不惡

和淵明歸田園居送潘清客六首

身行半天下何處無名山蘇門天下勝築室不待
年曩時孫公和今代潘子淵無家安四壁治生惟
守田去國行萬里往寄茅三間山川半豺虎一水
不得前寄謝李龍眠爲我寫風烟曲肱畫圖裏臥
遊西山巔尚恨畫中隱不得招閒閒有願何必遂
古人豈盡然

人生本無累世路自羈鞅悠悠塵中境翳翳霞外
想蘇門有佳處悵望不得往遙知西山下烟雨薇
蕨長有願神莫違誰謂河水廣夢逐西飛鳥一夕
馳渺莽

萬國角聲裏日莫行旅稀幽人如野鶴思逐南雲
飛宴宴花經眼冽冽風吹衣平生香火願毋使寸
心違

堂堂鳩林師法喜以爲娛談道有原委百川會歸
墟城市俛莫留野性山林居年荒拾橡栗濕柴燒
榭株尚憐陶與陸問訊今何如當如蓮社人寥落
今幾餘靜修復西去而獨逃空虛籃輿會相訪容
我醉時無

昨日遊東城今日復南陌偶逢素心人把手便歡
適一談復一笑不覺日西夕騎馬穿市橋矯首望
林隙歸來掩關臥尚恨爲物役四論喜僧肇立文
箋陸續會當投絕學繕性終何益

駕牛函谷關跨鹿澗水曲相期無翼飛豈不賢尊
足他年東坡翁一衲歸玉局相衰老不死分我一
明燭千年暗室中一旦得朝旭

題巨然泉巖老柏圖

雪巖森危有老柏幾度寒泉漱秋月氣凌層空白
日寒根貫斷崖蒼石裂奔騰逝水送流光剝落古
苔封老節明堂未作棟梁材潦倒風霜半無葉何
人胸次富泉石巨然袖中董源筆崖傾岸絕無人
見夜半移舟真有力賢侯筆力分曹植氣象叅天
二千尺爲回筆力挽萬牛頓覺烟嵐少顏色

夢登華山

夢登蓮華峰舉手摩青天道人寬我心相與掬飛
泉風吹青霞佩飄若雲中仙下視塵世人擾擾紛
腥羶直欲叫蒼穹生靈日熬煎安得側仙掌狂瀾
迴百川一洗六界塵萬騎還全燕功成不受賞棄
之若浮烟金膏換華髮玉液煉丹田金丹如可冀

脫屣區中緣閒尋碧玉調朗詠青苔篇還騎雙白
鶴飛下青山巔

尚書右丞侯公雲溪圖

朝遊雲溪上莫遊雲溪下不知雲溪雲去作人間
雨流水赴大壑白雲思故山何時溪上人心與歸
雲閒黃公山下雪溪路十里溪光照雲樹溪流瀝
瀝讀書聲想見先生舊遊處溪上老僧今白頭天
書招我歸來休圯上方傳黃石畧山中未暇赤松

遊我公昔年提孤軍旌旗絳幄張魚鱗鯨鯢沸天
海水渾罵賊嚼齒欲見齧旄猊十萬寄一身咸陽
白骨迴青春九重嘆息天爲顰殿前論事氣益振
滄海未全歸禹貢山東且願變齊民匣內寶書金
屈戍腰間瑞節玉麒麟衛國錦衣歸故里代公黑
髮更慈親他年鐘鼎出元勳二十四考中書君整
頓乾坤濟時了飄然却返雲溪雲

過廣武山

金言卷十一
六
塵霾晦金鏡鹿走羣雄馳龍騰海水沸虎怒風林
披成臯天下險楚漢昔相持乃翁一杯羹且欲共
分之兩雄不並立鴻溝徒爾爲褻瘡撫戰士智勇
亦已疲滎陽非吾厄帝圖乃天姿陰陵夜失道慷
慨兒女悲長陵一杯土笑煞牧羊兒勝負兩蝸角
興亡一枰棋而況彼區區二蟻爭雄雌西登廣武
山曠望九河湄野曠知天迥崖傾覺岸危青山明
劍戟霜林列旌旗雲槎秋浩渺烟樹晴參差淒涼

阮生嘆曠浩謫仙詞懷古念離散興極淚還垂

河中八詠

舜井

一水獨冷然浮雲幾變遷心知思舜處時見井中
天

夷齊墓

讓伐理難全求仁豈怨天乾坤吾道獨宇宙此山
傳不肯食周粟猶應飲舜泉冥鴻饑欲死落日暎

昏烟

鸛鵲樓

樓成鸛鵲幾時還人去樓臺境自閒地接連城秋水渡河分兩岸夕陽山墟烟冉冉分秦樹隴鴈依依度晉關千古廢興還造物暫携風月出塵寰

逍遙樓

黃河城上逍遙樓何人能作逍遙遊斷霞落日今猶古明月清風春復秋千里兵塵常漠漠五年心

事漫悠悠中條大華不忍見雲自高飛水自流

汾陽王像

天寶突騎興漁陽首提孤軍起朔方掃除攬搶廓氛翳再使日月光吾唐丹青凌烟誰第一功業汾陽異姓王當時太尉亦雄偉天不憖遺壯士傷河中重鎮甲天下渾公與公屹相望時危英雄常恨少撫壁再拜涕泗滂諸酋下馬識公否公雖云亡像在堂

吳生畫

吳生大士十六像歲久塵昏蛛網絲真物從來有
真賞息軒爲作証明師

楊惠之維摩像

一點傳心已失機更求形似轉成癡至今遺像兀
不語猶似當初問法時

先公碑

過客紛紛總不知先公事迹竹溪碑坡軒不薦山

僧意也覓西廂待月詩

汾陰祠后土

閒閒吏隱官蓬萊玉堂給札非仙才封香汾陰祠
后土騎士引赴軒轅臺龍門峽東天下險狀如萬
頃納一杯方丘中峙巨鼇趾黃河一箭從天來長
風吹雲碧海去曠蕩萬里晴天開青山終古不改
色下送落日浮金壘滄波幾回照新鴈往日繁雄
安在哉君不見漢家六葉誇雄才力通象羣臣龍

堆泰山日觀封禪罷屬車九九聲如雷橫汾中流
簫鼓發酒酣樂極情生哀秋風一曲在人間茂陵
桂樹空莓苔又不見開元四海不動塵千麾萬騎
祠神雕侍臣文章咸第一豐碑自勒鑿崔嵬憑高
慨詠才子句山川滿目空塵埃鈴聲琳琅蜀道雨
想見萬里愁雲迴蒲關北走滎河道巖深地古令
人老北師夜渡黃河水生人憔悴如霜草吾皇神
聖如軒轅北伐萬里清中原徧秩羣神禮喬嶽還
法駕幸河東

會靈觀卽事

戊寅五月十六日試宏詞二首

靈宮初雨餘散策步幽徑深樾不見人微風度疎
磬心閒偶無事虛極自生聽時復靜中喧歸禽莫

爭瞑

欹枕北窓風書葉久未定
午夢破華胥起看松陰
正閒居觀物化靜處見
天性鳴鳩亦何爲谷谷自
相應

題東坡石鍾乳山記墨蹟

書爲水漬幾半

東坡謫齊安人怒神所許
倒騎臥水龍醉踞石頭
虎赤壁萬里江一葉吾敢
侮歸來抵湖口此樂乃

并與扁舟絕壁下鸛鶴如
人語風雷相轟厯水石
互吞吐山遺洞庭樂帝下
釣天舞石鍾不吾欺一
證萬萬古遺墨落人間訛
缺十四五模糊魯壁簡
剝落岐陽鼓蜿蜒半鱗甲
尚恐脫風雨畫移瓦棺
壁劍化延平渚祝君什襲
藏隄防六丁取

武元直畫喬君章蓮峰小隱圖

武君非畫師勝槩飽胸臆
太華五千仞驅寫入盈
尺飛泉峰頂來落我松下
石清風忽吹散琴上濺

餘滴呼兒急寫之指下淋浪濕未知責子翁頗復
有此適何如圖中人真作林下客青山不違人但
恐富貴逼勇退良獨難此願誰能必向來燕趙間
逆旅拜真逸兒時弄琴者天涯老相識俛仰四十
年父子埋雙壁卷中題詩人十九已仙籍年光飛
鳥過紙上但陳迹對此還自傷何事爲物役還丹
日月遲白首陽光疾文章真小技身外皆長物拂
衣歸去來蓮峰入心碧

中元夜祭太一罷對月

今夕知何夕白露涵秋空褰衣踏明月如在瓊瑤
宮細數秋兔毫桂樹何璫瓏當年誰所種翳此天
公瞳清光知人意飛影入杯中流霞酌不盡清光
浩無窮我欲遡白雲一訪東坡公扁舟下赤壁此
樂將無同疇昔縞衣仙化作羽衣僮酒酣邀我去
鶴背冷松風靈官夜醮餘香霧飛不起更衣步石
壇風露浩如洗月波走金蛇入我清樽裏引杯不

復疑弓影正如此夜深聞雁過歛見
几松間
龍一吟風庭應落子空中步虛聲隱隱猶未已

東軒老人河山形勝圖

太虛匠流峙造化誰胚胎洪荒萬萬古至今餘劫
灰黃河發崑崙匣怒不敢乖初經龍門天下險勢
如萬頃納一杯桃花浪激不得上凡魚幾曝鱗與
腮下趨神睢如地底終古不到軒轅臺蒲津沈沈
臥虹影鐵牛駕浪輸黃能千里一曲復一曲傾山

倒嶽不復迴巨靈運東肘首華爲崩摧茅津濟師
想勝槩搔首北望令心哀萬派赴集津鼓聲如會
垓神斧忽中斷鑿鑿何年開崖傾路斷飛鳥絕輕
舟一箭浮天來篙師絕叫未及瞬回望已失雲濤
堆但見兩崖蒼蒼半天外三門斗落如驚雷擘窠
大字誰所銘高山百丈磨蒼崖廟前劉公一片石
龜龍剝落生莓苔東軒先生生長三晉地回視韓
魏空浮埃想像舊遊處落筆如山頽胸中元自有

山河寫出勝槩何壯哉餘波到諸郎直氣凌斗魁
況復文章妙天下睥睨晁張輦蘇梅竹帛如山不
經國安用江鮑稱詩才劉夫子我有一杯酒澆汝
胸崔嵬嗚呼聖道久榛塞孟氏闢路誅蒿萊諸儒
辛苦補罅漏未見巨手如排淮後生索塗方擿埴
雖有耳目如嬰孩祝君頽波作砥柱驅入聖海無
津涯劉夫子深藏什襲作龜鑑先君此圖吁可懷

春雪

幽窓不知春但覺寒轉加開門散飛雪帶雨不成
花盤空飛瓊舞作態正橫斜著樹暫瓊瓏少焉委
泥沙急埽枝上玉爲我試新茶不須待明月湯好
客更佳

題趙琳畫東坡石上以杖橫膝肩頭二首

廟堂竟何人此老乃石上盤礴萬古胸入此一藤
杖擊去荆舒蠻扶來司馬相君看熊虎顏百獸不
敢傍

東坡謫嶺南一笑六根靜食骨不棄餘又使羣狗
競手中果何物乃是照邪鏡爾曹何足容以杖叩
其脛

擬陶和許至忠二首

西日頽殘照北風凜寒威侏儒飽欲死幽人獨無
衣不上北闕書甘采西山薇曾子已再化甯蘧早
知非豈不樂仕宦恐與心事違柴桑舊三徑吾行
其庶幾尚憐淵明翁頗負責子譏隱居茅簷下聊

欲曝斜暉

歸田有何樂佳處正在茲閒與老農語夜雨深一
犁行年近六十悠悠復何之有田足我食有布成
我衣富於黔婁生樂於榮啓期妻子慍見言一點
不上眉吾師有遺訓貧賤不能移

題牧牛扇頭

一牛顧其犢一牛軒尻睢旁有牧犢子窺巢攀樹
枝嗟爾有餉具不念鴉鷓饑烏鴉各天性飛來護

其兒汝親亦念汝而人獨不知不如兩相忘人禽
相娛嬉

東籬采菊圖

淵明初亦仕迹留心已遠雅志懷林淵高情邈雲
漢妖狐同晝昏獨鶴驚夜半平生忠義心回作松
菊伴東籬把一枝意豈在酒醞不見白衣來目送
南山鴈淡然忘言說聊付一笑粲

贈眼醫

和扁不並世世豈無良醫今代王彥若恨無東坡
詩大弨臥壯士積熱下腦脂神針運斤風此妙人
得知君言吾有道神視了不疑擘山導河流破壁
取蛟螭聖道如日月浮雲時翳之誰爲補天手刮
膜施金篦韓孟不可作此藝真吾師

釣篷

船篷無可載意釣不在魚此身真襪屨萬事一簾
篠無載不載沈死魚安足餌洛水是非波臨軒聊

洗耳

聽雨軒

無田妻啼饑有田稻蟠泥等爲饑所驅貧富亦兩
齊雨中窓下眠窓外芭蕉語置書且安眠催租吏
如雨

擬東坡謫居三適

旦起嚙日

老人畏朝寒常恨爲物役爬搔未云已簡書催我

出爾來先朝叅晨起喜見日王事有期程安能待
披衣向東方聊復效龜吸漸漸支體柔谷谷
真氣入少焉肝腸煖陽和通百脉吾年六袞餘前
路那可必未來不吾預已逝安容息及此未病間
聊冀一漑益

午窓曝背

清晨了公事及午身得閒南榮有晴日曝背於其
間稍稍陽光舒融融和氣還時携一冊書眼花紛

金言卷十一
三
爛斑倦卽枕書臥散盡腰脚頑清於三杯餘甜勝
一味跽人間有此適不憂天公慳世人慕煖熱肉
屏醉雲鬟雖得一餉樂憂喜常相關癡兒亦笑我
市中有樵山

夜臥炕煖

京師苦寒歲桂玉不易求斗粟換束薪掉臂不肯
酬日糴五升米未有旦夕憂近山富黑墜百金不
難謀地炕規璣瓏火穴通深幽長舒兩脚睡煖律

初回鄒門前三尺雪鼻息方齁齁田家燒楮柶濕
烟怯淚流渾家身上衣炙背曉未休誰能獻此術
助汝當衾稠

傲梅聖俞月出斷崖口二首

未伏暑尚在雨點落未落夢覺起視夜缺月掛屋
角

殘星橫斜河晨鷄號天風幽人窓中眠紗厨明秋
空

長白山行

長白山雄天北極白衣仙人常出沒玉龍垂爪落
蒼崖四江飛下天紳白匹馬渡江龍飛天雲起侯
王化千百至今甲第多屬籍時清毬馬爭馳突錦
韉貂帽獵春風五陵豪氣何飄忽前年北騎瞰中
原準擬長城如削鐵君家兄弟真連璧胸中十萬
森戈戟向曾論事天子前漢庭諸人動顏色心知
不易一囚命顧肯貪功事無益西南方面應時須

帝曰來前無汝易從來十益不補損三輔蕭條半
荆棘瘦妻曳耙女扶犁惟恐官軍缺糧給嗚呼瘡
痍尚未復且願休兵養民力老夫謬忝春官伯白
首書生不經國佇公功成歸廟堂再獻中興二三

策

大金國志長白山白衣觀音所居其山禽獸皆
白黑水發源於此舊名粟末河後改名混同江

渡水僧二首

日落前溪渡鐘聲隔岸聞秋水深可涉挽衣踏行
雲行雲忽破碎波動生魚鱗化爲百千我何者爲

我身此身尚非我況復影中人畫師畫具眼了此
起滅因三生祠下夢一笑語前塵

一僧杭中流杖笠行相隨波紋生足指照影光瀾
瀾一僧到彼岸前引如導師腰間兩不借身外一
伽黎一僧方欲涉結帶如有思前山鳥飛夕後山
雲起時君看眉頰間中有摩詰詩

時雨 有序

時雨美胥莘公也公以行臺移鎮平陽鄰畏其威

民懷其德焉天降時雨山川出雲天相休運是生
世臣維我世臣乃國于莘天子命之牧爾邦民北
風喑喑雨雪霏霏嗟我晉人而瘡而痍吹之响之
摩之撫之于燠其寒于飽其饑旣瘳旣夷不嘖以
嘻孰爲豹虎載柵載壘孰爲螽賊載芟載理無擾
我鄉我鄉我里無伐我桑我桑我梓遠夷駟矣我
民祉矣公在在堂如春斯溫激矢在壺折衝於樽
民安於屢兵安於屯公在在堂錦衣繡裳敝予改

爲斯民不忘公在在堂繡裳錦衣我民之思無以
公歸

皇武 有序

皇武命平章公移鎮陝右也皇奮厥武如雷如霆
獷彼遠夷載震載驚帝命相臣蘇此疲民維時莘
公展也大成公自平陽移鎮於秦世皆謂公在處
陽春公在在秦有年無兵世皆謂公斯民德星維
此二方不寧不令帥臣議征發言盈庭公奏累上

如山不傾世皆謂公漢之營平旣完三輔復保五
城以迄於今夏人請盟維將盡能維公竭誠公拜
稽首天子之明我公歸矣我民思矣詔公復起周
邦咸喜願公百年以佐天子罔俾樊侯于周專矣

鄭子產廟

晉楚更霸爭雄尊勢如兩虎挾一豚玉帛事楚方
南轅晉師已及國北門鄭有人焉國無小晉楚雖
大談笑了臨風三嘆酌酒樽注目蒼陂望高鳥

過湖城

莫行潼關道百里蒼山昏峯斷忽平野大河東南
奔我行屬冬季風雪浩以繁玄雪結層陰狐貉不
得溫豈不念白首出使萬里藩惜彼守凍者據鞍
復何言

過閿鄉

秦關百二天下壯百萬雄師未能傍函關未了又
潼關潼關之敗何等閒九齡斥逐姚宋死邊將邀

功從此始今年西屠石堡城明年又起漁陽兵朝
廷欲藉邊將重不覺猪龍心晤動祿山前死未可
知雖有漁陽突騎將奚爲自古明王重用武莫笑
書生陳腐語

含元殿

秦山從北來宮殿何巍巍含元遺址在下建十丈
旂當昔休明日軒陛朝諸夷一旦人事改翻坐牧
羊兒譬如元氣衰百疾攻四肢陵夷更五代興亡

如奕棋塵埋梨園骨火燒花萼碑寢殿通樵徑宮
墻揮酒旗至今明月夜石馬空聞嘶蒼天不可問
渭水空自馳誰爲後來者應與此心期

過乾陵

乾陵故梁山也舊有柏萬株亡矣有石藩王
像來朝者六十四至今猶存下有章懷太子

墓

曉日上乾陵乾陵何巍巍前瞻對雙闕上有十丈
碑左右藩夷像想見朝貢時一抔土未乾袞服易
禕衣好還雖天道剪伐盡本枝淒涼廬陵謫慷慨
黃臺辭賴有狄相國取日洗咸池母后盜國鼎呂
氏非薄姬中睿乃其子天幸亦其宜驪山三日火
見笑牧羊兒如何陵上栢獨有神護持千秋百歲
後魂魄復來茲故山草木赭應悔復辟遲天回西
日照歲莫北風吹南登樂遊園默誦昭陵詩

全金詩卷十一

全金詩卷十一

三

四

全金詩集卷十一

全金詩集卷十一

三

四

